

Dithero tsa Tirelano mo Kutlwanong

Thero ka Sontaga o o bidiwang Kwasimodogeniti, e le ka 15. 04. 2012
22/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 127 – 115/117
2. **Thapelo:** Rara wa rona yo o mo legodimong, o re itshepise ka boammaaruri jwa gago. Lefoko la gago ke la boammaaruri. Amen.
3. Epistolo ka fa thulaganyong ya 2 e kwadilwe mo go 1 Petoro 1:3-9;
Efangele ka fa thulaganyong ya 1 e kwadilwe mo go Johane 20:19-29.
4. A go ipolelwe tumelo ya bokeresete!
5. Sefela sa 126 – 114/116

6. Thapelo ya mmadi wa thero.

7. **Epistolo** ka fa thulaganyong ya 4 e kwadilwe mo go

Bakolose 2:12-15, e re: "Ka lo fitlhlilwe le Keresete ka kolobetso, lo bile lo tsositswe nae ka go dumela mo thateng ya Modimo o o mo tsositseng mo baswing. Le lona ba lo neng lo sule ka ditlolo le ka go-sa-rupang ga nama ya lona, o lo tshedisitse nae, wa re itshwarela ditlolo tsotlhe, wa phimola lokwalo lo lo re bayang molato lo lo neng lo emelanye le rona ka melao, wa lo tlosa fa gare ka go lo kokotela mo sefapaanong, wa apola babusi le balaodi, wa ba supa mo ponatshegong, wa tlhaba koma ka bone mo go ene." Amen.

8. Thero: Phuthago e e rategang ya Morena wa rona Jesu Keresete, lokwalo lo lwa moapostolo Paulo lo lebaganye le phuthago ya gagwe ya kwa Kolose ba ba neng ba tshwenngwa ke dithuto tsa maaka le ditsietso tsa baporofeti ba kako. Bone ba ne ba jwala go sa utlwane le go belaela mo gare ga badumedi. Moapostolo a kwala mo ditemanang tsa 8 - 10, a re: "Itiseng gore go se nne ope yo o lo ithopelang ka thuto ya bothale le ka tsietso ya boithamako ka fa melawaneng ya batho, ka fa dithateng tsa tlhago tsa lefatshe, mme e seng ka fa go Keresete. Gonne botlalo jothle jwa Bodimo bo agile mo go ene ka sebele. Mme lona lo dirilwe ba botlalo mo go ene yo e leng tlhogo ya balaodi botlhe le mebuso yotlhe."

Moapostolo o ba bontsha se se botoka, o gopotsa batho ba gagwe, o gopotsa le rona kajeno a re: Mo go Keresete go na le tsotlhe tsa Modimo ka botlalo. Ka lebaka la eng? O ne a ineela mo losong ka ntlha ya rona gore re gololwe mo maleong le mo thateng ya ga Satane, re nne le pholoso e e sa khutleng mo go Keresete. "Ka lo fitlhlilwe le Keresete ka kolobetso, lo bile lo tsositswe nae ka go dumela mo thateng ya Modimo o o mo tsositseng mo baswing. Le lona ba lo neng lo sule ka ditlolo le ka go-sa-rupang ga nama ya lona, o lo tshedisitse nae, wa re itshwarela ditlolo tsotlhe," Ka lebaka la eng? Ga diragala jang? A re: "Wa phimola lokwalo lo lo re bayang molato lo lo neng lo emelanye le rona ka melao, wa lo tlosa fa gare ka go lo kokotela mo sefapaanong."

Tota, a Modimo o lebogwe! Ke o o re golotseng jalo, wa roma Morwaaona yo o rategang Jesu Keresete, wa baya maleo a batho botlhe ba lefatshe mo godimo ga gagwe gore re nne bana ba ba rategang ba ona. "Jesu o pholeleditse ka ntlha ya maleo a rona, a teketelwa melato ya rona. Petso ya mo wela gore rona re bone kagiso. Mme re fodisitse ka dintho tsa gagwe." (Jes. 53:5). Re abetswe bopelotlhomogi jo bogolo jo mo kolobetsong e e boitshepo. Ka letsatsi leo Morena Keresete o ikopantse le rona. Kolobetso ya rona e re kopanya le loso le tsogo ya ga Jesu Keresete. Jaaka Jesu a ne a swa, a tsoga mo losong, fela jalo le rona re a swa, le go tsoga mmogo le Keresete. Motho yo mogologolo wa rona o swa mo metsing a go tsalwa sešwa, ga tlholwa motho yo mošwa wa rona. Ke gore: Botshelo jo bošwa ka moletlo wa tsogo, botshelo jo bošwa ka letsatsi la kolobetso, tse pedi tseo di tsamaelana, di mmogo. Sa bogologolo le se sešwa ka kwano, le koo. Sa bogologolo se fetile. Bona, se sešwa se tlhagile. A go lebogwe leina la Morena! Modimo o tsositse Morwaaona Jesu Keresete mo losong. Jesu Keresete a tswa mo phupung, a tsoga mo baswing ka letsatsi la boraro, a fenyja jalo loso, sera sa bofelo sa rona. Ke nnete! Jesu o nyeleditse loso, a baya botshelo le bosasweng mo leseding ka Efangele, 2 Tim. 1:10.

Dr. Martin Luther o araba potso, le Kereke ya Lutere e e araba fela jalo, e e reng: Kolobetso e nayang gongwe e thusang? ka gore: "Kolobetso e naya boitshwarelo jwa dibe, e bile e golola mo losong le mo go Satane; mme botlhe ba ba dumelang se mafoko le ditsholofetso tsa Modimo di se buang, e ba naya phologo ya bosakhutleng. Fela jalo potso e e reng: Mafoko ao le ditsholofetso tseo tsa Modimo ke dife? ka gore: Ke tse Keresete, Morena wa rona, o di buang mo go Mareko kgaolo ya bofelo a re: "Yo o dumelang, a ba a kolobediwa, o tla pholosiwa, yo o sa dumeleng ene o tla atlhola."

Ka Kategisima e nnye go arajwa le potso e e reng: Metsi a ka dira jang dilo tse dikgolo tseo? ka gore: Ga se metsi a a di dirang, mme ke Lefoko la Modimo le le mo metsing le tumelo e re ikanyang Lefoko leo la Modimo mo metsing ka yona; gonne fa Lefoko la Modimo le se yo mo go ona, e ntse e le metsi fela, mme e seng kolobetso. Mme fa Lefoko la Modimo le le mo metsing, metsi ao ke kolobetso, ke gore ke metsi a botshelo a a nang le pholoso, le gona ke tlhapiso ya go tsalwa sešwa ka Mowa o o Boitshepo, jaaka Moapostolo Paulo a kwaletse Tito mo kgaolong ya boraro a re: "Modimo o ne wa re pholosa ka tlhapo ya go tsalwa gape le ka ntshwafatso ya Mowa o o Boitshepo o o goromeditse mo go rona ka Jesu Keresete, Morepholosi, gore e tle e re fa re sena go siamisiwa ka bopelotlhomogi jwa ona, re nne baruaboswa ba botshelo jo bo sa khutleng jo re bo solofelang. Lefoko leo ke le le ikanyegang."

Ka Kategisima e nnye go arajwa le potso ya bone malebana le kolobetso e e reng: Go kolobediwa ka metsi go kayang? ka gore: Go kaya gore Atame yo mogologolo yo o mo teng ga rona a nweidiwe ka boikwatlhao le tlhabologo ka malatsi otlhe gore a swe, mme maleo otlhe le dikeletso tsotlhe tse di bosula di swe nae; mme jaanong go tswe go be go tsoge motho yo mošwa ka gale, yo o tshelang fa pele ga Modimo, a le mo tshiamong le mo boitshekong ka bosenabokhutlo. Go kwadilwe kae? Go kwadilwe mo lokwalong lwa Baroma kgaolo ya borataro; teng moapostolo Paulo a re: "Re fitlhlilwe le Keresete ka kolobetso gore re swe (ntlheng ya bolelo), re tle re tsamae mo botshelong jo bošwa, jaaka Keresete le ene a tsositswe mo baswing ka kgalalelo ya ga Rara."

Kolobetso ke motheo wa tumelo ya rona. Kolobetso e e boitshepo ke motheo wa botshelo jwa rona ka kwano mo lefatsheng le mo go le le tlang. Kolobetso ke motheo wa go pholosiwa ga rona. Kwa ntle ga kolobetso ga go na pholoso. Kwa ntle ga kolobetso ga go na botshelo jo bo sa khutleng. Ka kolobetso re amogela thata go tlhabana le Satane, le lefatshe, le nama ya rona. Ka kolobetso e e boitshepo re abelwa thata go tlhabana tlhabano e e molemo ya tumelo, re nne sekao se sentle mo bathong mo gae le koo ka kwa ntle, le fa re le baleofi. Ke nnete, bagaetsho, ke lona letlhogonolo le le sa ka keng le bolelwa. Nna le wena re golotswe mo thateng ya bolelo. Nna le wena re golotswe mo thateng ya ga Satane. Bosula le tshiamololo le tatlhego ga di tlhole di na le thata mo go rona.

Thata ya metsi a botsalo jo bošwa e feta thapelo le tlhaloganyo ya rona. Bosaitsiweng jwa Modimo bo bonala ka matlho a tumelo fela. Ka letsatsi la kolobetso batsadi le basupi le ba phuthago le moruti ba bona metsi fela. Le fa go ntse jalo thata le kgalalelo ya Modimo o o se nang tshimologo, le e seng bokhutlo di teng, di fitlhlilwe, di mo sephiring. Thata eo e e fitlhegileng ya Modimo e re belega ka metha mo go tse di molemo le mo go tse di bokete tsa botshelo jwa rona, e re sikara mo dithaelong tsa ga Satane, e re fetisa le mo letsatsing la bofelo jwa rona, fa re tshwanetse go tloga ka kwano mo lefatsheng la ditlalelo, re kgaogane le ba re ba ratang. A re lebogeng Modimo yo o re tlhodileng! A re lebogeng Modimo o o re tlhodileng sešwa ka metsi le ka Mowa. 2 Kor. 9:15 e re: "Modimo a o lebogelwe neo ya ona e e fetang go ka boletwa!" Amen.

9. Thapelo: Modimo, Rara wa rona yo o rategang yo o mo legodimong, re lebogela Lefoko le le boitshepo la gago le le re gomotsang, le go re tiisa, le go re godisa. Re lebogela disakaramente tse di boitshepo, Kolobetso le Boipobolo le Selalelo se se boitshepo gore re nne le mofago mo tselang ya go ya kwa gae. Re lebogela phuthago ya gago, bakaulengwe ba ba rategang, bomorwa-Rre, le bokgaitsadie mo tumelong ba bantsi ba ba mo tseleng mmogo le rona ya go ya mo legodimong. Re kopa mo go wena, Morena, re re: O re utlwele bothoko, rona baleofi, o re itshwarele.

Tlatsa dipelo tsa rona ka Mowa o o Boithspo wa gago gore re go sale morago ka go ikanyega ka malatsi otlhe a botshelo jwa rona, re tle re goroge mo bokhutlong jwa tumelo ya rona, re tsene mo kgalalelong e e sa khutleng ya gago kwa re tla nnang teng mo kagisong le mo boitumelong jo bo sa feleng ka Jesu Keresete. Amen. Thapelo ya Morena: Rara wa rona yo o mo legodimong ...

10. Sefela sa 121 – 109/ -

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann, ka ngwaga wa 2011.

Kgatiso le go rongwa ga dihero tseo go tshegediwa ke kopano e e bidiwang The Lutheran Heritage Foundation.